

Cartë naguá lu ra Hebreos

**Dios biadi'dzë lu hia'a iurë
bëdchini shini më**

1 Tiempë guahietë guni'i Dios
lu shtadë guélú hia'a iurë
biadi'dzë ra profetë. Zihani vësë
nu zihani manërë guni'inú më lu
shtadë guélú hia'a por enseñansë
shtë ra nabiadi'dzë shti'dzë më
²perë iurne' lúltimë tiempë
biadi'dzë më lu hia'a iurë bëdchini
shini më, Jesús. Dios bëcue'shtë
guédchiliu por lë'ë shini më, nu
gulé Dios shini më parë guëñibé'ai'
grë cusë nananú guédchiliu nu
gube'e. ³Lë'ë shini më na ziquë
galrabtsë'ë shtë Dios. Ziquë na Dios
zni na Jesús, ecsactë ziquë Shtádi'.
Por Jesús rni'bi grë ra cusë; por
pudërë shtë shti'dzë më adë rialúdi'i
guédchiliu. Despuësë de bëzunë
më almë shtë hia'a de grë duldë,
iurní guzubë më lugar shtë hunurë
ladë ldi cula'ni Dios pudërusë catë
quëbezë më gube'e.

**Shini Dios na más më
ru'bë quë ra ianglë**

⁴Lë'ë shini Dios na më más më
ru'bë quë ra ianglë. Pues bë'në
Jesús recibir mejurë lugar; bëdë'ë
Dios tubi lë parë shini më namás

lasac quë lë shtë ianglë. ⁵Dios
nunquë adë guni'idi'i' lu tubi ianglë:
Lé'ël nal shinia.

Bëna punërë lé'ël; súbël lugar
shtë hunurë.

Nunquë guni'i Dios de tubi ianglë:
Na nahia Dadë parë lé'ël.
Nu lé'ël gáquël shinia.

⁶Perë iurë bëshe'ldë Dios shini më
lu guédchiliu, bë'në më honrar lé'i'
nu guni'i më:

Grétë' ianglë shtë Dios gunë rai'
adorar lé'ël.

⁷De ra ianglë guni'i Dios:
Quëhunë më gac rai' ziquë mbë.
Gac rai' ziquë be'llë narru'u lu gui'i
të gunë rai' lo quë narnibë'a më.

⁸Perë lu shini Dios guni'i më:
Nal Dios; catë rnibé'al na parë
siemprë; adë tsalúdi'in.
Bandërë shtë'nël quëhunë
significar nal rëy justë.

⁹Rac shtú'ul ra cusë tubldí, perë
rna tús'hël nanádi'i de acuerdë
con lëy shtë më.

Por ni Dios shtë'nël bëtiá'ai' sëiti
guéquël të guëquitë ldú'ul
más quë grë ra sa'l.

¹⁰Nu zac guni'i Dios de lë'ë më:
Nia Dadë, lé'ël bëcue'shtël grétë'
ra cusë dizdë principi shtë
guédchiliu.

Con guí'al bëcúe'shtël gube'e.

¹¹ Lë'ë rahin tsalú perë lé'ël
guëá'nël parë siembrë.

Grë rall guëac rall ziquë lari
gushë.

¹² Nu lé'ël guëtú'bil gué'dchiliu nu
gube'e ziquë daa'.

Gac cambi grë ra cusë ni, perë
lé'ël nal mizmé nedzé nu parë
siembrë; lé'ël guëbánil parë
siembrë.

¹³ Nunquë guni'i Dios lu tubi ianglë:

Guzubë ladë ldi shtëna hashtë
guna gan lu grë enemigu
shténel nu guëzu'bë diaguë
rall shti'dzël.

¹⁴ Grë ra ianglë na rai' espíritu
narunë cumplir voluntá shtë Dios.
Bëshe'ldë më lë'ë rai' parë gunë
rai' compa'ni ra nabë'në recibir
salvaciuni shtë më.

**Adë chu guësá'nëdi'i
salvaciuni shtëna'a**

2 Blac llëru'bë na shini Dios;
por ni napë quë guédé'na'a
cuendë bien ra di'dzë nabínia'a të
parë adë chu guëséá'nëdi'i shnezë
Dios. ² Ra shti'dzë Dios naguni'i ra
ianglë antsë, napin pudërë nu grë
ra mënë nadë rzu'bë diaguëdi'i
shti'dzë më, guc cashtigu rall. Bë'në
rall recibir pagu justë según duldë
nu faltë nabë'në rall. ³ Verdá nahin,
por ni ñllallë guédé'na'a të parë
guëca'chilú hia'a lu juici si talë adë
guëzu'bë diaguëdi'ia'a diza'quë?
purquë llëru'bë na salvaciuni shtë
më. Lë'ë salvaciuni rë' primërë
biadi'dzë Dadë Jesús, nu despuësë
ra nabini shti'dzë më, bë'në rai'
testificar de quë verdá na di'dzë
ni. Bédé'na'a recibir di'dzë shtë

salvaciuni de lë'ë rai'. ⁴ Nu Dios
bëluá'ai' shti'dzi' na verdá por
sëni nu milagrë nu cusë ru'bë nu
por Espíritu Santo nabëne'e më
parë cuesnüh'i' lë'ë hia'a. Cadë
túbia'a bédé'na'a recibir don
nabëzëlaa'dchi Espíritu Santo según
voluntá shtë Dios.

**Jesucristo gúqui' ziquë
bëchi sa' hia'a**

⁵ Stubi puntë; adë gunibé'adi'i
Dios de quë gué'dchiliu naze'dë,
gaquin bajo ordë shtë ra ianglë.
Cagni'i na'a shcuendë gué'dchiliu
verdadërë. ⁶ Pues tubi partë shtë
Sagradas Escrituras rni'i zni:

¿Chull na nguii të parë rëagná
ldú'ul lé'i'?

Grë nguii gati rall.

¿Pëzielú rac shtú'ul cuesnül
lé'ëll?

⁷ Por du'pë tiempë bé'nël të napë
nguii menos hunurë quë ra
ianglë
perë bé'nël honrar lë'ë nguii
con hunurë ziquë tubi corunë.
Nu bédé'ël pudërë parë
guëribë'a nguii grë cusë
nabëntsá'ul.

⁸ Grétë' cusë bëcué'zël guëa'
nguii; guëzu'bë diaguë rall
shti'dzë nguii.

Iurë bëcúe'zë Dios grétë' cusë
guëa' nguii, bédë'ë Dios permissi
guëribë'a nguii grétë' cusë. Sin
quë adë guëté'dëdi'i, rnádi'ia'a grë
cusë bajo ordë shtë nguii ⁹ perë rna
hia'a lu Jesús, el quë Dios bë'në
punërë ziquë tubi nalasáquëdi'i lu
ra ianglë por du'pë tiempë. Rna
hia'a lu Jesús; bë'në Dios honrar
lé'i' con zihani hunurë naná ziquë

tubi corunë purquë bë'në më
sufrir hashtë gúti'. Por tubi favurë
nabënë Dios, guti Jesús por grë
mënë.

¹⁰Dios bëntsa'u grë cusë purquë
zni bëuu' ldu'u më; gurështëhin
parë Dios nu por lë'ë më. Guc shtu'u
më guësëdchini më zihani shini
më gube'e catë quërelde më lu llni.
Por ni guc më justë iurë bëshelde
më Jesús lu guédchiliu të sac zíhi'.
Bé'ni' cumplir grë sufrimentë; por
ni adë rúnëdi'i faltë ni tubi cusë; na
më cabësë shtë ra naná salvar. ¹¹El
quë narunë të gac mënë shmënë
Dios, nu ra shmënë më naná runë
cumplir grë voluntá shtë më, napë
rai' mizme Shtadë rai'. Por ni lë'ë
shini Dios rtúdi'i lúhi' iurë rni'i më
na rai' ziquë famili shtë më. ¹²Ni na
de acuerdë con Sagradas Escrituras
naná rni'i:

Guna alabar lë'el delantë lu ra
bëcha,

nu guna alabar lë'el juntë con
los de más shmënë nardëa
por nombre shtënel.

¹³Nu zac rni'i Sagradas Escrituras:
Na tsaldí ldua'a shti'dzë më.

Stubi lugar rni'in:

Na zugá'ahia ndë'ë con shini

Dios naná bëne'e më parë na.

¹⁴Verdá grë ra shini nguii napë
rai' mizme clasë cuerpë con rënë nu
belë. Zni zac Jesús guc nguii con
cuerpë shtë nguii të parë gati më;
zni bédë'ë më fin pudërë shtë el quë
nabësëdchini galguti lu guédchiliu.
Lëll Satanás. ¹⁵Nu bë'në më librar
ra nardzëbë gati rall, ra nardzëbë
con galërdzëbë ru'bë guédubi vidë
shtë rall. ¹⁶Pues nasegurë adë
bídëdi'i më lu guédchiliu parë

gunë më compa'ni ra ianglë, sino
be'dë guédchini më lu guédchiliu
ziquë llëbni Abraham parë gunë
më compa'ni lë'ë ra nguii. ¹⁷Por ni
bëqui'ni gac më igual ziquë bëchi
sa' më të gac më tubi bëshuzi ru'bë
narga'a ldu'u ra mënë nu parë gúni'
cumplir grë lo quë narac shtu'u
Dios. Nu bédchini më parë quilli
më con rënë shtë më por duldë, nu
parë guédchisú më grë duldë shtë
ra shmënë më. ¹⁸Guzac zi më nu
gudëdë më zihani prëbë durë. Por
ni iurne' rac runë më compa'ni grë
ra narzac zi lu cualquier cusë durë.

Jesús na más më ru'bë quë Moisés

3 Bëchi naná unidë con Dios
santu, guna'bë më lë'ë
të, të guëquërdënu të lë'ë më
la'ni gube'e. Gulë bë'në llgabë
bien chu na Jesús; náhi' el quë
nabëdchini por nombre shtë Dios
nu náhi' bëshuzi namás lasac nu
náhi' bëshuzi ru'bë parë lë'ë hia'a.
Parë creenci shtë hia'a nídi'i stubi
naná rialdí ldu'u hia'a. ²Lë'ë Jesús
bë'në cumplir voluntá shtë Dios, el
quë nabë'në punërë lë'i' bëshuzi
shtë hia'a. Bë'në më cumplir igual
ziquë Moisés bé'ni' cumplir grëtë'
lo quë naguni'i Dios lúhi' parë ra
shmënë më guahietë. ³Sin quë adë
guëtë'dëdi'i, Jesús runë tucarë más
hunurë quë Moisés. Nahin ziquë
tubi nguii narza'a tubi hiu'u; runë
tucarë nguii ni más hunurë quë
lë'ë hiu'u. ⁴Cadë hiu'u napin el quë
nabëzá'ahin, perë Dios bëcueshtë
grëtë' cusë nananú la'ni guédchiliu
nu gube'e. ⁵Siempre Moisés bë'në
cumplir voluntá shtë Dios. Guc
Moisés tubi muzë entrë ra shmënë

më parë biadí'dzi' shti'dzë Dios lu rai'. Zni Moisés bë'në testificar de lo quë naguni'i Dios lúhi', cusë naguër gac despuësë. ⁶Perë Cristo na shini më nabë'në cumplir grë voluntá shtë Dios entrë ra shmënë më. Pues na hia'a shini më si talë guëdë'na'a segurë fe shtë hia'a, si talë adë rdzëbëdi'ia'a nu si talë adë guëazë guëtëdi'ia'a shnezë më jamás, nu si talë guëquitë ldu'u hia'a por esperansë nadápa'a.

Guëzi'i ldu'u ra shmënë Dios

⁷Por ni ziquë cagni'i Espíritu Santo:

Nedzé iurë guini të lo quë narni'i Dios,

⁸adë runë naguédchidi'i ldu'u të cumë ziquë bë'në mënë guahietë; bëdzatsu mënë cuntrë Dios.

Dzë ni bëtë'dë rall prëbë lu Dios iurë ziazú rall lu lumë shlatë catë chu nádí'i.

⁹Nga'li ra shtadë guelú të bëtë'dë rall prëbë lua.

Zni bë'në rall durantë cuarenta izë; guná rall milagrë lo quë nabëna.

¹⁰Por ni bëldëa con lë'ë rall nu gunia'a shcuendë rall: “Siempre ldu'u rall bësini lë'ë rall lu duldë; nunquë bënguë bë'adi'i rall shneza”.

¹¹Bëna prometer con juramentu, nunquë jamás adë tsutédi'i rall catë rzi'i ldu'u mënë con na, catë rbedchí ldu'u rall.

¹²Bëchi, gulë gapë cuidadë ni tubi de lë'ë të gapë tubi ldu'u naná rianaldë tëchi cusë mal, nu por ni adë rialdídi'i ldú'ul shti'dzë Dios

nu guësá'nël lë'ë më nanabani.

¹³Mejurë cadë tubi të guni'inú sa'l cunseju parë tsaldí ldu'u sa'l más cadë dzë mientras nanú tiempë. Gulë guni'inú los de más sa'l të parë ni tubi de lë'ë të gapë të ldu'u naguédchi por duldë nacuguë ra nguii. ¹⁴Si talë adë guësá'nëdi'ia'a diza'quë, sino tsaldíru'u ldu'u hia'a hashtë gátia'a, iurní unidë na hia'a con Cristo.

¹⁵Zni rni'i Sagradas Escrituras:

Nedzé si talë guínil lo quë

narni'i Dios,

adë runë naguédchidi'i ldú'ul

cumë bë'në ra mënë guahietë

iurë bëquë guia'a rall lë'ë më;

adë guc shtú'udi'i rall gac

Dios shlamë rall.

¹⁶¿Chúllëti'i bëquë diaguë shti'dzë Dios nu despuësë bë'në rall cuntrë lë'ë më? Mizmë mënë nabëru'u ladzë Egipto con Moisés ziquë cabësë shtë rall. ¹⁷¿Chullëti'i

bëldënú Dios por cuarenta izë? pues mizmë mënë nabë'në duldë nu guti rai' nu bëa'në cuerpë rai' lu shlatë catë nídí'i mënë. ¹⁸¿Chullëti'i guni'i Dios con juramentu adë tsutédi'i rall catë rzi'i ldu'u më? Pues mizmë mënë nanadë bëzu'bë diaguëdi'i shti'dzë më. ¹⁹Por grë ndë'ë rac bë'a hia'a adë bë'nëdi'i rall gan tsutë rall purquë adë gualdídi'i ldu'u rall shti'dzë më.

4 Por ni, aunquë nanú tubi promësë guëzi'i ldu'u hia'a con lë'ë më, rqui'ni gápa'a cuidadë no sea lu cualquier de lë'ë të, guëni'i më: “Runa juzguë nu adë tsutédi'il lugar ni”. ²Pues parë mizmë lë'ë hia'a bëdchini shti'dzë Dios ziquë bëdchinin parë ra mënë

guahietë, perë ra mënë ni adë
bë'nëdi'i rall recibir shti'dzë më con
fe cumë cusë za'quë purquë adë
gualdídi'i ldu'u rall shti'dzë më; adë
bëllu'i'di'i shti'dzë më parë lë'ë rall.
³Perë lë'ë hia'a gualdí ldu'u hia'a
nu guaté hia'a catë rzi'i ldu'u hia'a
con lë'ë më. De stubi mënë guni'i
më:

Gualdídi'i ldu'u rall na; por
ni bëldëa nu gunia'a con
juramentu,
adë tsutédi'i rall catë guëzi'i
ldu'u rall con na.

Guni'i Dios ra di'dzë ni aunquë
bëdë'ë më fin shchi'ni më dizdë
bëntsa'u më guédchiliu. ⁴Pues
ze'dë tubi partë shtë Sagradas
Escrituras narni'i shcuendë dzë
narzi'i ldu'u mënë:

Dios bëzi'i ldú'i' dzë gadchi de
grë dchi'ni nabë'në më.

⁵Stubi lugar guni'i më:

Adë tsutédi'i rall catë guëzi'i
ldu'u rall con na.

⁶Todavía runë faltë parë sëbëldá
mënë tsuté rall catë guëzi'i ldu'u
rall con Dios, perë lë'ë mënë nabini
diza'quë primërë, adë tsutédi'i
rall catë guëzi'i ldu'u rall purquë
bëzu'bë diáguëdi'i rall shti'dzë
më. ⁷Por ni Dios bëluá'ai' tubi dzë
señaladë naná nedzë. Cagni'inú
Dios lë'ë hia'a iurne' por lo quë
naguni'i David aunquë llëduni
tiempë zia'a. Guni'i David di'dzë rë'
naná bëquëa'a tampa:

Nedzë iurë guini të lo quë
narni'i Dios, adë runë
naguédchidi'i ldu'u të.

⁸Si talë Josué nadë'ë descansë
parë ra më israelitë, pues Dios
adë niabrídi'i guëni'i më de stubi

dzë guëzi'i ldu'u mieti. ⁹Zni nanú
tubi galërzi'i ldu'u naná ziquë dzë
gadchi iurë guzi'i ldu'u Dios. Guëzi'i
ldu'u shmënë Dios ¹⁰purquë grëtë'
el quë natsuté shnezë Dios catë rzi'i
ldú'ull con lë'ë më, nápëll descansë.
Hia gualú shchí'nill ziquë guzi'i
ldu'u Dios lu grë dchi'ni shtë më.
¹¹Por ni cha guëdé'na'a fuersë parë
tsuté hia'a catë guëzi'i ldu'u hia'a
con lë'ë më, no sea quë cualquier
de túbia'a zia glá'ga'a mizme nezë
ziquë bë'në ra mënë nadë gualdídi'i
ldu'u shti'dzë Dios guahietë nu guti
rai'.

¹²Zni runë tucarë guëdé'na'a
purquë di'dzë naguni'i Dios,
nabanin nu napin pudërë. Nahin
ziquë tubi spadë dushë naná
guërupë tēchi. Shti'dzë më riuté
hashtë más la'ni ldu'u nguii.
Shti'dzë më runë dividir almë, nu
espíritu, nu llicu nu hashtë la'ni
ba'cu shtë mieti. Riuté shti'dzë
më hashtë la'ni llgabë mënë nu
hashtë galërni'i ldu'u nguii parë
gunin juzguë lë'ë rahin. ¹³Ni
tubi cusë nabëntsa'u më adë
rac guëca'chilúdi'i lu më. Grëtë'
nanuhin shlatë. Rna më nu nanë
më grë lo quë naquëhunë mieti nu
napë quë guëté'da'a cuendë lu më.

Jesús na bëshuzi namás lasac entrë grë bëshuzi

¹⁴Jesús shini Dios, na më bëshuzi
ru'bë parë lë'ë hia'a; guaté më catë
quërelde Dios lu gube'e, por ni
guiaglá'ga'a firmë lu shnezë Dios
con diza'quë nagualdí ldu'u hia'a.
¹⁵Lë'ë bëshuzi shtë hia'a, rga'a
ldú'i' lë'ë hia'a. Riaséhi'; nanéhi'
grë debilidá nadápa'a purquë lë'ë

më gudëdë më lu mizmə prëbë nadápa'a, perë sin quë adë bënëdi'i më duldë. ¹⁶Por ni guiabí'ga'a lu më catë nanú më. Guiabí'ga'a lu trunë shtë Dios sin quë adë chu rdzëbëdi'i. Por favurë shtë më guëga'a ldu'u më lë'ë hia'a nu gunë më compa'ni lë'ë hia'a cualquier nicidá nadápa'a.

5 Cadë bëshuzi ru'bë naná designadë entrë ladi ra nguui, nápi' carguë parë gúni' representar ra mënë lu Dios. Runë bëshuzi ofrecer lu Dios ra ofrendë shtë mënë nu sacrifici por duldë shtë rall. ²Mizmə bëshuzi ni rac runë tratë nadu'u con ra mënë naguënëdi'i voluntá shtë Dios nu rëazë guëtë rall shnezë më, purquë bëshuzi ni nápëll mizmə debilidá cumë grë mënë. ³Por debilidá ni rqui'ni gunë bëshuzi ofrecer tubi ma ziquë sacrifici lu Dios por ra duldë nabë'në bëshuzi nu zac rúnëll ofrecer ra ma por duldë shtë los de más mënë.

⁴Ni tubi nguui gululë mizmə lë'ëll ziquë bëshuzi con hunurë shtë galbëshuzi, sino Dios gululë lë'ëll mizmə manërë ziquë gululë më lë'ë Aarón. ⁵Zni zac Cristo adë bëshepi guiá'adi'i' të gáqui' bëshuzi, sino Dios gululë lë'i' nu guni'i më lu shini më:

Lë'ëll nal shinia; gululëhia lë'ëll.

⁶Nu zac rni'i Dios stubi lugar:

Lë'ëll nal bëshuzi parë siembrë,
ziquë mizmə clasë cumë
Melquisedec.

⁷Iurë Jesús gubani lu guéd'chiliu rë', guna'bë më lu Dios; bënë më ruëguë lu Dios. Guni'i më fuertë nu cantidá nisë bëru'u lu më. Guna'bë më lu Dios, el quë

nanapë pudërë parë guelá lë'i' lu galguti, nu Dios bëquë diágui' shti'dzë shini më purquë Jesús guc cunformë; bën'i' cumplir voluntá shtë Shtádi'. ⁸Aunque Cristo na shini Dios, por galërzac zi nabë'në më sufrir, bësë'dëi' parë guëzu'bë diágui'. ⁹Iurë gudëdë grë ra cusë durë nu bënë më gan lu ra prëbë, guc më el quë nardë'ë vidë eternë parë grë ra narzu'bë diaguë shti'dzë më. ¹⁰Gululë Dios lë'ë Jesús; gúqui' designadë bëshuzi ru'bë con mizmə hunurë ziquë Melquisedec.

**Dios gunë cashtigu si talë
guëazë guéta'a lu shnezë më**

¹¹Nanú zihani cusë más parë guënia'a lu të shcuendë bëshuzi ru'bë nadápa'a. Parë guna explicar parë tsasë të, naganin purquë adë riasëdi'i të lueguë. ¹²Hia gudëdë tiempë dizdë gualdí ldu'u të diza'quë; hia runë tucarë guëlua'a të los de más sa' të, perë todavía rqui'ni stubi mënë guëlua'a lë'ë të stubi vësë más ra cusë sencigi, ra primërë puntë shtë ra enseñansë narialdí ldu'u hia'a. Na të ziquë tubi narqui'ni gu purë lechë en vez de gaul cumidë con belë. ¹³Grë ra naná ziquë me'dë naná radchi, adë rac bë'adi'ill mudë narunë tucarë guëquërdëll con sa'll. Nall ziquë tubi ngulë'në narqui'ni tubi mësë. ¹⁴Perë ziquë cumidë na parë ra mënë ru'bë, los de más puntë shtë enseñansë, na parë ra mënë naná riasë guadë na mal nu guadë na za'quë. Mënë ni hia napë rall tiempë lu shnezë Dios nu tsagla'guë runë rall gan lu duldë.

6 Por rsunë ni, cha guiaglá'ga'a delantë parë tsarú'ba'a;

guësé'da'a más enseñansë shtë Cristo. Adë guëá'nëdi'ia'a sulë con ra enseñansë sencigi nabëdé'na'a recibir más antsë. Enseñansë ni runë tratë napë quë guëabrí ldu'u mieti lu Dios, nu adë rúnëdi'i mënë confiar ra obrë za'quë. Ra enseñansë sencigi rni'i napë quë tsaldí ldu'ul shti'dzë Dios. ²Nu cagni'in shcuendë custumbrë shtë rdchi'bë guia'a shmënë Jesús guëc sa' rall, nu runin tratë lla guëriubë nisë zihani cusë. Cagni'in shcuendë de quë tsashtë ra tēgulë stubi, nu de quë ze'dë guëdchini juici eternë. ³Pues guiaglá'ga'a delantë si talë gunë më compa'ni lë'ë hia'a.

⁴Ra naguasë di'dzë ni, ra nabëquitë ldu'u por lo quë nabëne'e më, ra narunguë bē'a Espiritu Santo, ⁵ra nabëquitë ldu'u con shti'dzë Dios, nu ra narac bē'a pudërë shtë ra naguëni'bē'a iurë gac më rēy, ⁶Si talë guëazë guetë rall, nu rni'i rall shti'dzë Dios nádi'in verdá, nídi'i mudë guëabrí ldu'u rall lu më stubi vultë purquë mizme lē'ë rall quëquē'ë rall lē'ë shini Dios lu cruz stubi vultë, nu quëhunë rall burnë lē'ë më delantë lu ra mēnë. ⁷Na nguiu rē' ziquë lachi naná rlaguë guiu lúhi'. Iurë lē'ë guiu rlaguë, ruu' guiu'u nisë. Si talë guiu'u tsagla'guë rdē'ë cusechë parë ra naquëhunë dchi'ni, pues napin bendición shtë Dios. ⁸Perë si talë lē'ë guiu'u rdē'ë guitsë nu gui'lli nadë rluu'fidi'i, iurní mal na guiu'u ni nu guëlladchi na cashtigu shtë Dios parë guiu'u ni; fin shtëhin na ziquë tubi cusë narie'qui.

Nadápa'a esperansë; por ni dzu hia'a firmë lu shnezë Dios

⁹Aunque quëadi'dza zndē'ë lu tē, bëchi narac shtua'a, napa segurë de

quë lēdë znídi'i con lē'ë tē purquë nasalvar tē nu quëhunë tē cusë za'quë. ¹⁰Dios na më justë; adë guëá'ldēdi'i ldu'u më grë dchi'ni nabē'nē tē parë lē'ë më. Rëagná ldu'u më lla guc shtu'u tē sa' tē, lla bē'nē tē sirvë lē'ë rai' purquë na rai' shmēnë më. Adë guëá'ldēdi'i ldu'u më de quë tsagla'guë quëhunë tē compa'ni lē'ë rai'. ¹¹Ziquë rac shtu'u sa' tē, iurne' rac shtu'u na'a cadë tubi tē guëlua'a de quë napë tē zihani esperansë hashtë guëabrí më stubi. ¹²Adë gac tē nabëchi sino gulë rgubēnebi ejemplë shtë ra narialdí ldu'i de verdá con pacēnci; iurní quëhunë rall recibir ra cusë za'quë nabē'nē më prometer parë grë ra naná shmēnë më.

¹³Segurë gunë më cumplir lo quë nabē'nē më prometer purquë iurë bē'nē më prometer lu Abraham, bē'nē më jurar por mizme lē më purquë nídi'i stubi más më naru'bē quë lē'ë më. ¹⁴Guni'i Dios lu Abraham: “De verdá gunë ldaiha lē'ël nu guënehia cantidá llēbnil”. ¹⁵Abraham gulézi' con pacēnci hashtë guc cumplir shti'dzë më; zni bē'ni' recibir lo quë naná bē'nē më prometer lúhi'. ¹⁶Iurë ra nguiu runë rall jurar, rni'i rall juramentu por nombre shtë tubi namás më ru'bē quë lē'ëll. Juramentu ni na garantiá de quë gúnēll cumplir; rqu'fidi'i cusë más. ¹⁷Iurë guc shtu'u Dios guëluá'ai' clarë lu ra shmēnë më de quë adë gúnēdi'i më cambi shti'dzi', bē'nē më prometer con juramentu. ¹⁸Zni por chupë di'dzë nagúnēdi'i cambi jamás, nasegurë lo quë nadzuléza'a. Nídi'i mudë shti'dzë Dios niac bishi; por

ni lè'è hia'a naná bésa'nè cusè shtë guédchiliu nu na hia'a segurè con lè'è mè, nadápa'a rsunè ru'bè parè tsaldí ldu'u hia'a; adè guèsá'nèdi'i hia'a promèsè naguni'i mè lu hia'a; tsaglál'ga'a firmè con lè'è mè hashtë gunè mè cumplir promèsè naguni'i mè lu hia'a. ¹⁹Lè'è esperansè nadápa'a, na ziquè tubi gui'bè ru'bè naquèhunè segurè barcu lu nisè. Segurè nu fuertè na esperansè ni parè almè shtë hia'a. El què nanapè esperansè ni, nall ziquè el què nariuté catè cabezè Dios Santo. ²⁰Ndè guaté Jesús por lè'è hia'a tè tsanál'da'a lè'è mè lugar ni despuèsè. Na mè representantè shtë hia'a tè parè tsuté hia'a lugar ni. Na mè primèrè bëshuzi parè siemprè con mizmè hunurè què Melquisedec.

Jesús nu Melquisedec

7 Lè'è Melquisedec guc rëy shtë guédchi Salem nu gúqui' tubi bëshuzi delantè lu Dios naquèbezè más guia'a. Iurè bëabrí Abraham catè guáhi' lu guèrru nu gudíni' ra rëy contrari, Melquisedec guagtsa'guèlúhi' Abraham, nu bè'nè ldáihí' lè'è Abraham. ²Iurní Abraham bédè'è ca'a Melquisedec décimo partè shtë ra cusè naná bédchisú Abraham de enemigu shtëhi'. Lè Melquisedec runè cuntienè “primèrè rëy naná justè”. Melquisedec guc rëy narnibè'a Salem, nu Salem runè cuntienè, “galèrbedchí ldu'u mieti”. Por ni Melquisedec na rëy shtë paz. ³Perè parè Melquisedec adè guènédi'ia'a lè shtëdi' u lè shní'ai'; adè guènédi'ia'a guc gúli' nilè guc gúti'. Adè guènédi'ia'a chu guc shtadè

guèlú Melquisedec. Zni náhi' ziquè figurè shtë shini Dios; náhi' bëshuzi naná cuezè parè siemprè.

⁴Iurne' gulè bédè'è cuendè blac llèru'bè guc Melquisedec, pues mizmè shtadè guèlú hia'a, Abraham, bédè'èi' décimo partè shtë grè cusè lo què nabédchisúhi' guia'a rëy iurè gudildi rai'. ⁵Según lèy shtë Moisés, ra bëshuzi naná llèbni' Leví, napè rai' mandadè shtë Dios parè gunè rai' cubrè de mènè décimo partè nanapè ra mènè; nahin parè Dios. Ra bëshuzi bè'nè rai' cubrè de grè sa' rai' aunquè na rai' llèbni' Abraham. ⁶Perè Melquisedec nádi'i' famili shtë Leví perè bé'ni' recibir décimo partè nabédè'è Abraham cuá'ai'. Nu Melquisedec bè'nè ldáihí' Abraham, el què nabè'nè recibir ra promèsè shtë Dios. ⁷Clarè riasé hia'a el què naquèhunè bendecir, más lasáqui' què ra mènè narunè recibir bendición. ⁸Entrè ládía'a iurne' grè ra bëshuzi narunè recibir décimo partè shtë cusè nanapè mieti, guédchini dzè gati rai'; perè shcuendè Melquisedec rni'i Sagradas Escrituras de què lé'i' bé'ni' recibir décimo partè nabédè'è Abraham. Melquisedec náhi' ziquè tubi naziagla'guè nabani. ⁹Nu rac guèní'ia'a de què Leví nu grè ra bëshuzi naná llèbni' Leví, ra naná runè recibir décimo partè shtë cusè nanapè mènè iurne', gudilli rai' juntè con Abraham iurè bédè'èi' lu Melquisedec nabè'nè tucarè cá'ai' ¹⁰purquè aunquè todavía adè gúlèdi' Leví, náhi' cumè llèbni' ladi Abraham iurè Melquisedec guagtsa'guèlúhi' lè'è Abraham.

¹¹Ra mènè israelitè bè'nè rai' recibir lèy shtë Dios tiempè dzu

ra shini Leví cumë bëshuzi, perë lëy adë bé'nëdi'i gan gac mënë perfectë delantë lu Dios. Por ni gu' necesari guëdchini stubi bëshuzi mejurë, lédëdi'i ziquë ra bëshuzi naná shini Aarón nagululë Dios, sino bëqui'ni guëdchini tubi bëshuzi ziquë Melquisedec con llëru'bë hunurë. ¹²Pues iurë nanú cambi shtë galbëshuzi, iurní zac rqui'ni gac cambi lëy narunë tratë shcuendë galbëshuzi. ¹³Lë'ë bëshuzi shtëna'a, el quë ra di'dzë rë' quëgni'i shcuëndi', náhi' llëbni stubi shini Jacob, lédëdi'i shini Leví ziquë los de más bëshuzi. Ni tubi bëshuzi na shini de cualquier shini Jacob sino sulë ra shini Leví na rai' bëshuzi. ¹⁴Bien rdë'ë hia'a cuendë Jesús ze'dë entrë llëbni Judá, nu Moisés niétiquë guní'i' de quë shini Judá gac rai' bëshuzi.

¹⁵Más clarë na shcuendë bëshuzi cubi nadápa'a, iurë rëagná ldu'u hia'a ze'dë guëdchini stubi bëshuzi naná ziquë Melquisedec con llëru'bë hunurë. ¹⁶Adë binlúdi'i galbëshuzi shtë më ni por tubi lëy narunë punërë bëshuzi según ra shtadë guëlú bëshuzi, sino gac Jesús bëshuzi sulë purquë napë më pudërë; gátidi'i më parë siembrë.

¹⁷Rni'i zndë'ë la'ni Sagradas Escrituras de lë'ë më:

Lé'ël nal tubi bëshuzi parë
siembrë
ziquë mizme clasë de
Melquisedec. Nápël llëru'bë
hunurë.

¹⁸Zni mandamientë nabëdë'ë Dios guahietë, gac cancelarín purquë nápëdi'in pudërë nu adë rlluf'idi'in parë guëdchisú duldë shtë

mënë. ¹⁹Pues lëy shtë Moisés adë bé'nëdi'i gan parë gac nguiu limpi delantë lu Dios, perë en cambi, iurne' nadápa'a esperansë, por ni riabí'ga'a lu më.

²⁰Pues Dios bë'në nombrar Jesús ziquë bëshuzi con juramentu. ²¹Los de más bëshuzi gac nombrar rai' sin ni tubi juramentu, perë guni'i Dios lu bëshuzi cubi con tubi juramentu. Guni'i më:

Lë'ë Dadë, bé'ni' jurar nu adë
gúnëdi'i' cambi shtí'dzi'.
Lé'ël nal tubi bëshuzi parë
siembrë. [Ziquë mizme clasë
shtë Melquisedec.]

²²Por ni Jesús na tubi garantiá de quë nadápa'a tubi conveñi mejurë quë conveñi nanapë ra mënë guahietë. ²³Los de más bëshuzi gac cantidá rai' purquë guti rai'; adë nídi'i mudë tsagla'guë rai' cumë bëshuzi; adë bé'nëdi'i rai' gan guëquërdë rai' parë siembrë. ²⁴Perë Jesús adë rátidi'i; galbëshuzi shtë më adë tsalúdi'i. Na më bëshuzi parë siembrë. ²⁵Por ni Jesús napë pudërë; gunë më salvar parë siembrë ra nariabi'guë lu Dios por medio de lë'ë Jesús purquë nabáni' parë siembrë nu quëhúni' ruëguë lu Dios por lë'ë hia'a.

²⁶Zni Jesús na bëshuzi completamente ecsactë ziquë rqui'nia'a, ziquë ni tubi chu nádi'i. Na më santu; nápëdi'i më duldë; rsiguëdi'i më lë'ë hia'a; purë na më. Bëshepi guia'a Dios lë'i' más quë cualquier cusë nanabani lu gube'e. ²⁷Nádi'i më ziquë los de más bëshuzi nanapë quë gunë rall ofrecer ra ma por duldë shtë rall, iurní despuësë por duldë shtë ra

sa' rall. Jesús b'èni' ofrecer mizmè l'è'i' ziquè sacrifici parè grètè' hia'a. Rquí'nidi'i stubi sacrifici jamás parè siembrè. ²⁸L'è l'èy shtë Moisés gululè nguui tē gac rall bēshuzi namás lasac aunquē napē rai' duldē; perē juramentu shtë Dios bēdchini más despuēsē quē l'èy, nu b'è'nē mē nombrar l'è shini mē tē gáqui' bēshuzi parè siembrè. Gululè Dios shíni', el quē nab'è'nē cumplir; nídi'i stubi cusē narunē faltē tē gac mē bēshuzi parè siembrè.

Jesús rni'inúhi' Dios por l'è hia'a

8 Primèrè puntē shtë naquēgni'i na'a lu tē na nd'è; nadápa'a tubi bēshuzi namás lasac. Guzubē mē lu trunē shtë Dios gube'e. Quēbezē mē ladē ldi shtë Dios naná lugar shtë hunurē. ²Nu quēhúni' sirvè la'ni lugar verdadèrē naná bēntsa'u Dadē, lédēdi'i nguui. Ndē cabezē Jesús juntē con Dios Padre.

³Grē ra bēshuzi namás lasac lu guédchiliu, guc nombrar rai' parē gunē rai' ofrecer lu Dios ofrendē nu sacrifici nabēd'è mēnē según l'èy. Nu rquí'ni Jesús gápi' tubi cusē parē gúni' ofrecer. ⁴Si talē l'è mē niabezē mē guédchiliu, adē nádi'i mē bēshuzi purquē todavía nianá nanú ra bēshuzi narunē ofrecer ofrendē según rnib'è'a l'èy shtë Moisés. ⁵Perē ra bēshuzi lu guédchiliu, quēhunē rai' ofrecer lo quē naná sulamētē tubi muestrē de lo quē nananú gube'e. Rd'è hia'a cuendē de quē nahin copi purquē iurē Moisés b'è'nē recibir ordē shtë Dios parē guntsá'uhi' lugar catē gunē ra mēnē adorar Dios, gunib'è'a mē lúhi': "Rnia'a

lul, bēntsa'u lugar ni ecsactē según muestrē nabēluá'ahia lul guēc dani". ⁶Zni guc con primèrè rēglē nabēd'è Dios, perē iurne' gululè Dios Jesús ziquē bēshuzi naquēhunē sirvè lugar naná zihani vultē más mejurē quē lugar catē ra bēshuzi naguquērdē antsē b'è'nē rai' sirvè. Jesús na el quē narni'inú Dios por l'è hia'a. Por Jesús l'è conveñi cubi nadápa'a con Dios, nahin mejurē quē conveñi gushē purquē pudèrē shtë conveñi cubi ze'din por promèsē naná mejurē.

⁷Si talē primèrè conveñi nápēdi'in faltē, iurní adē rquí'nidi'i conveñi cubi. Si talē por primèrè conveñi niac mēnē naza'quē delantē lu Dios, iurní niasēdchini Jesús stubi conveñi naná cubi. ⁸Perē Dios guná lu ra mēnē nab'è'nē recibir primèrè conveñi ziquē mēnē narunē faltē lo quē naná mejurē. Guní'i mē shcuendē rai' la'ni Sagradas Escrituras:

L'è Dadē Dios rni'i: Guédchini dzē; guntsa'ua tubi conveñi cubi con ra mēnē shtë Israel nu Judá.

⁹Adē gáquēdi'in ziquē conveñi naná bēntsa'ua con ra shtadē guélú rall tiempē bēna compaṇi l'è rall, tiempē bēséhia l'è rall tē guèru'u rall Egipto.

Adē b'è'nēdi'i rall cumplir l'è conveñi shtëna. Por ni bēsa'na l'è rall, rni'i Dadē.

¹⁰L'è conveñi naná guntsa'ua con naciuni Israel despuēsē ra dzē ni, gaquin znd'è, rni'i Dadē. Guēsēdchinia mandamientē shtëna la'ni ldu'u rall.

Guëquëa'a shti'dza lu ldu'u rall
parë adë guëá'ldëdi'i ldu'u
rall shti'dza.

Iurní gaca Dios shtënë rall de
verdá; hia lë'ë rall gac rall
shmëna.

¹¹ Dzë ni adë rquí'nidi'i chu
guëlua'a tubi sa'll;
rquí'nidi'i nguui guëní'll lu
béchill: "Bënguë bë'a lë'ë
Dadë Dios" purquë grëtë'l rall
gunguë bë'a rall na dizdë ra
mitu'në hashtë más ra më
gushë naná ladi rall.

¹² Nu guna perdunë duldë shtë
rall; guëga'a ldua'a lë'ë rall;
jamás adë guëagnádi'i ldua'a ra
duldë shtë rall.

¹³ Iurë lë'ë Dios quëgni'i shcuendë
conveñi cubi rë', na purquë rna
më conveñi gushë cumë cusë nadë
rllu'i'idi'i parë mënë naná quërelde
ne'. Lo quë nanapë tiempë nu adë
rllu'i'idi'in, nasesë guënitiluhin.

**Lugar catë runë mieti adorar
Dios lu guédchiliu nu gube'e**

9 Nanú stubi cusë importantë.
Lë'ë primërë conveñi napë
rëglë parë gunë mieti adorar Dios
la'ni tubi iádu'u shtë guédchiliu.
² Lë'ë lugar catë bë'në mënë adorar
Dios, napë chupë partë. Primërë
partë lë Lugar Santo; nga'li
quëbezë gandelierë nu mellë; lu
mellë dchi'bë guetështildi nabë'në
mënë presentar lu Dios. ³ Hia tēchi
cortinë shtë primërë partë, quëbezë
lugar lë Lugar Santísimo. ⁴ Nga'li
nanú tubi bëcu'guë naná purë orë
catë rie'qui ialë, nu nga'li nanú tubi
cajë nabë'në significar lë'ë conveñi.
Guëdubi ladë naquë orë. Nezë la'ni

cajë ni nanú mbluri nanactsa'u
orë. La'nin nanú guetështildi maná,
nu zac la'ni cajë nanú varë shtë
Aarón. Varë ni bëguë; gualdani
ndiaguë ladi ni. Nu zac la'ni
cajë nanú ra guë'ë catë bëquë'ë
Dios di'dzë shtë conveñi. ⁵ Subrë
guëc cajë ni quëbezë ra ianglë
naquëhunë representar pudërë
nu gluri shtë Dios. Hia ianglë ni
nachi'li shcuaguë lugar catë rac
purdunë ra duldë shtë mieti. Iurne'
nápëdia'a tiempë parë guëquëa'a
más shcuendë lugar ni.

⁶ Iurë grë ra cusë ni na listë, ra
bëshuzi riutë rai' primërë partë
shtë iádu'u parë gunë rai' cumplir
custumbrë religiuse lo quë
naginibë'a Dios. ⁷ Perë segundë
partë shtë lugar ni, Lugar Santísimo,
nga'li riutë primërë bëshuzi, perë
sulë tubsë vësë cadë izë. Iurë lë'i'
riutë, rquí'ni guá'ai' rënë shtë
ma tē parë rúni' ofrecerin ziquë
ofrendë por duldë shtëhi' nu por
duldë shtë ra mënë. ⁸ Por di'dzë
rë' lë'ë Espíritu Santo quëgní'i' de
quë mientras ra mënë bë'në rai'
cumplir custumbrë la'ni primërë
partë shtë iádu'u, todavía nídi'i
entradë parë lë'ë rall lu lugar catë
cabezë Dios. ⁹ Grë ndë'ë na tubi
mustrë de lo quë quëhunë mënë
iurne' la'ni iádu'u. Ra ofrendë nu
ra ma naquëhunë mieti ofrecer lu
Dios, adë nápëdi'i rahin pudërë
parë guëdchisú duldë shtë mënë
tē parë cuedchí ldu'u rall delantë
lu Dios. ¹⁰ Nadë más ra custumbrë
quëhunë tratë pē cusë gau mieti u
pē gu mieti u shcuendë tsati guia'a
mieti con ra rëglë narunë tratë por
fuërë shtë mieti. Napë ra custumbrë

ni valurë sulamëntë hashtë tiempë gunë më cambi mudë nagunë mënë adorar lë'ë më.

¹¹Perë Cristo bēdchíní' ziquē bēshuzi namás nasac parē ra cusē za'quē nabe'dē guēdchíni. Lē'ē lugar catē quēhunē mē sirvē ziquē bēshuzi, nga'li na tubi lugar namás cusē za'quē, lēdē tubi mēnēdi'i bēntsa'u lugar ni. Quiere decir, adē nādi'in cusē shtë gué'dchiliu rē'.

¹²Guaté Cristo Lugar Santísimo tubsē vēsē parē siembrē, lēdēdi'i parē gunē mē ofrecer rēnē shtë chivē u rēnē shtë ngunē, sino con propi rēnē shtë mē guaté mē; bē'nē mē segurē salvaciuni nanápēdi'i fin parē lē'ē hia'a. ¹³Ra bēshuzi bētiá'ai' rēnē shtë chivē nu ngunē, nu bētē'tsēi' dē shtë bēcierru nagüe'qui lu bēcu'guē guēc ra mēnē nabēga'ldē tēgulē. Si talē custumbrē ni rllui'i parē gunin purificar shcuerpē nguui, ¹⁴mucho más pudērē napē rēnē shtë Cristo, purquē por medio shtë Espiritu Santo nanápēdi'i fin, Cristo bē'nē mē ofrecer mizmē lē'ē mē lu Dios ziquē sacrifici nanápēdi'i ni tubi manchē. Rēnē shtë mē rac guēzunē ldu'u hia'a de grē duldē nu obrē nadē rlluí'idi'i parē guédē'na'a sirvē lu Dios nanabani.

¹⁵Por ni Jesucristo na mē el quē nabēsēdchíni conveñi cubi, tubi tēstē cubi entrē Dios nu lē'ē hia'a. Galguti shtë Cristo bē'nē parē gac perdunē grē duldē shtë ra nabē'nē mal según rēglē shtë primērē conveñi. Guna'bē Dios lē'ē rall tē gunē rall recibir grē lo quē nabē'nē mē prometer, tubi herenci eternē.

¹⁶Parē gac cumplir termē shtë tēstē,

rqui'ni prēbē de quē hia guti el quē nabēntsa'uhin ¹⁷purquē adē gac repartir herenci shtë nguui hashtë despuēsē gati nguui. Mientras nabani nguui lē'ē tēstē guēa'nē guíá'ai'. ¹⁸También termē shtë conveñi primērē guzublú iurē rēnē bēllē'ē. ¹⁹Moisés iurē guní'i' grē ra puntē shtë lēy lu ra mēnē, guná'zi' rēnē shtë chivē nu bēcierru con nisē nu tubi llicu hiaguē hisopo con guitsē ladi lli'li color llini; iurní bēgá'dzi' llicu hiaguē ni con rēnē nutsē con nisē; iurní bēchu'bē nísi' librē shtë lēy, nu zac grétē' ra mēnē bēchu'bē nísi' con rēnē. ²⁰Iurní guni'i Moisés: “Ndē'ē na rēnē narunē lasac tubi conveñi narnibē'a Dios parē lē'ē tē”. ²¹Moisés bēchu'bē nísi' con rēnē lē'ē lugar catē bē'nē ra mēnē adorar Dios, nu bēchu'bē nísi' con rēnē grétē' ra cusē nabē'nē dchi'ni rai' tē gunē rai' adorar Dios. ²²Pues según lēy casi grétē' cusē napē quē guēzunēhin por rēnē. Sin quē adē guēllē'ēdi'i rēnē, nídi'i perdunē shtë duldē.

Por galguti shtë Cristo nanú perdunē shtë duldē

²³Por ni rnía'a de quē ra cusē nananú gué'dchiliu, cusē naná copi shtë ra cusē lu gube'e, bēqui'ni guēzunē rahin por rēnē shtë ma, perē ra cusē shtë gube'e también rqui'ni guēzunē rahin con sacrifici mejurē quē rēnē shtë ma. ²⁴Cristo adē guatédi'i' Lugar Santísimo nabēntsa'u mēnē lu gué'dchiliu; nahin copi shtë cusē verdadērē nananú gube'e; sino guaté mē gube'e catē quēbezē Dios. Ndē guadi'dzēnú mē Dios Padre de

favurë shtë hia'a. ²⁵Lë'ë primërë bëshuzi lu gué'dchiliu riatéll Lugar Santísimo tubsë vësë cadë izë parë gúni' ofrecer rënë shtë ma lu Dios, perë rënë ni nádi'i rënë shtë bëshuzi sino rënë shtë ma. Perë Cristo adë rúnëdi'i' ofrecer rënë shtëhi' zihani vultë sino tubsë vësë ²⁶purquë si talë adë zni nádi'in, iurní niati më zihani vësë dizdë lë'ë gué'dchiliu gurështë. Perë iurne' tubi vësë parë siembrë Cristo bédchini nu b'è'në më ofrecer mizmə vidë shtëhi' parë grétë' mënë. Bëllë'ë rënë shtë më tē guédchisú më duldë. ²⁷Ziquë na segurë napë quë gati grē mieti nu despuësë gati nguiu, gunë më juzguë nguiu. ²⁸Zni zac Cristo tubsë vësë gúti' ziquë tubi sacrifici; bëllë'ë rënë shtë më por duldë shtë mënë. Perë guëlua'alú më lu hia'a stubi vultë, lédëdi'i parë guédchisú më duldë sino parë gunë më salvar grétë' ra naquëbezë lë'ë më, ra narac shtu'u guëabrí më nasesë.

10 Lë'ë lëy nabëquë'ë Moisés guquin nadë más ziquë muestrë shtë ra cusë verdaderë nanaguër guédchini. Lë'ë lëy nápëdi'in pudërë tē gac mënë naza'quë lu Dios por medio ra ma nabë'në mënë ofrecer zihani vësë cadë izë. ²Purquë si talë lëy nihunë gan parë gac mënë naza'quë lu Dios, iurní niabezë nihunë rall ofrecer ra ma purquë grétë' ra naná limpi lu Dios adë nápëdi'i rall llgabë naquëgni'i guéc rall por duldë nabë'në rall. ³Perë por ra ma nabë'në rall ofrecer, bëagná ldu'u rall duldë shtë rall cadë izë. ⁴Pues rënë shtë ra ngunë nu rënë shtë chivë jamás adë guédchisúdi'i duldë shtë mënë.

⁵Por ni iurë bédchini Cristo lu gué'dchiliu, guni'i më:

Adë rac shtú'udi'il sacrifici shtë ma, nilë ofrendë, sino quë bënë'el tubi cuerpë parë na.

⁶Adë rquítëdi'i ldu'ul con ra sacrifici narië'qui lu bëcu'guë, nilë con ra ofrendë narne'e mënë por duldë.

⁷Iurní gunia'a: "Iurne' zelda parë guna cumplir voluntá shtë'nël. Niá Dadë; ziquë naescritë shcuenda la'ni librë."

⁸Primërë rni'i Dios quë adë bëquítëdi'i ldu'u më por ra ofrendë nu por ma narië'qui lu bëcu'guë, nilë por sacrifici parë guédchisú ra cusë ni duldë shtë ra nguiu, cusë nangunibë'a lëy gunë mieti. ⁹Despuësë guni'i më: "Zelda parë guna voluntá shtë'nël, Dadë". Ndë'ë runë cuntienë de quë b'è'në Dios cancelar primërë règlë tē gunë më punërë stubi règlë mejurë. ¹⁰Por règlë cubi, b'è'në më perdunë duldë shtë hia'a; bëzunë më ldu'u hia'a tē parë gáca'a santu. Zni nahin purquë Jesucristo bédë'ë më prupi shcuerpë më ziquë sacrifici. Guti më; iurní rquínidi'i stubi ofrendë.

¹¹Grë ra bëshuzi israelitë quëhunë rai' ofrecer ra ma lu Dios. Cadë dzë tsagla'guë quëhunë rai' ofrecer mizmə ofrendë aunquë por rënë shtë ra ma, nilë por cuerpë shtë ma narië'qui, nunquë guédchisú ra cusë ni duldë shtë mënë. ¹²Perë Jesucristo b'è'në më ofrecer mizmə lë'i' por ra duldë tubsë vësë parë siembrë. Despuësë guti më, iurní guzubë më ladë ldi shtë Dios.

¹³Nga'li quëbezë më hashtë gunë

më gan lu grë enemigu shtë më.
Gunë më vencer lë'ë rall. ¹⁴Por
tubsë ofrendë nabë'në më ofrecer,
bëzunë më ldu'u mënë; bë'në më
ra mënë santu parë siemprë, ra
naquërelde sulë parë lë'ë më. ¹⁵Lë'ë
quë lë'ë Espíritu Santo quëhúni'
testificar lo mizme purquë guní'i'
más antsë;

¹⁶Lë'ë conveñi naguna con lë'ë
rall despuësë ra dzë ni, rni'i
Dadë,
guëcue'za grëtë' mandamientë
shtëna la'ni ldu'u rall.
Nu guëquëa'a ra mandamientë
la'ni shgabë rall.

¹⁷Nu zac rni'i Espíritu Santo:
Jamás adë guëagnádi'i ldua'a ra
duldë shtë rall, ni ra cusë mal
nacanahunë rall.

¹⁸Catë bë'në më perdunë duldë, hia
rquí'nidi'i másru'u ofrendë por ra
duldë.

Guiagbí'ga'a lu Dios

¹⁹Por grë ndë'ë bëchi, rac
tsuté hia'a gube'le por rënë shtë
Jesús. Adë rdzëbëdi'i tsuté hia'a.
²⁰Rac tsuté hia'a por tubi nezë
cubi narne'le vidë sin fin; nezë ni
bësha'lë më hashtë lugar catë cuezë
Dios santu, quierë decir, por galguti
shtë Jesús bëshá'li' nezë ni. ²¹Jesús
na më primëre bëshuzi parë lë'ë
hia'a. Na më encargadë con grë
lidchi Dios. ²²Por ni guiagbí'ga'a
lu më con confiansë; tsaldí ldu'u
hia'a de verdá. Nu zac guiagbí'ga'a
con ldu'u hia'a nalimpi lu më nu
con cuerpë naguá tubi bañi con
nisë naquichi. ²³Guiaglá'ga'a
firmë lu shnezë Dios, adë chu
guëazë guëtëdi'i shnezë më purquë

nasegurë gunë më cumplir grë lo
quë nabë'në më prometer. ²⁴Nu
guëdília'a manërë parë guëdë'na'a
compañi ra sa' hia'a parë gac shtu'u
sa' hia'a más nu parë guëdë'na'a
cusë za'quë. ²⁵Adë gáca'a ziquë ra
nanédi'i guidë lu cultë catë rdëá
hia'a; mënë ni nacustumbradë
rídëdi'i rall. Mejurë guëni'inú sa'
hia'a tē gac rall firmë. Zni napë quë
guëdë'na'a cumplir iurne' purquë
lë'ë dzë naguëabré Jesús, ze'dë
guëdchini.

²⁶Si talë nané hia'a verdá shtë
Dios nu mizme tiempë rac shtu'u
hia'a tsaglága'a nezë mal, iurní nídí'i
stubi sacrifici tē gac perdunë duldë
shtë hia'a purquë rquë guía'a hia'a
sacrifici shtë Cristo. Quëdë'na'a
tratë galguti shtë Cristo ziquë cusë
përuchi. ²⁷Sulë nanú juici shtë Dios
parë lë'ë hia'a iurní. Gaquin ziquë
tubi gui'i tantë rldë më. Gunë më
cashtigu grë contrari shtë më. ²⁸El
quë nabë'në desprëci lëy shtë Moisés
nu adë bëzu'bë diaguëdi'ill lëy ni,
gútil sin quë adë chu bëgá'adi'i
ldu'u nguii ni; con testimonio shtë
chupë u tsunë testigu guti nguii dzë
ni. ²⁹Perë çpë rni'i tē gac con nguii
naná bëlua'a téchi' lu shini Dios nu
bëquë guiá'all rënë shtë conveñi
narunë parë gac nguii santu? nu
bé'nëll desprëci lë'ë Espíritu shtë
Dios naná bë'në zihani favurë parë
lë'ë hia'a. Por rënë shtë më na hia'a
limpi delantë lu më. ³⁰Rac bë'a
hia'a lë'ë Dadë naná guni'i: "Guna
cashtigu ra mënë; napa derechè
guëguilla". Nu zac rni'i shti'dzë më:
"Lë'ë Dadë gunë më juzguë shmënë
më". ³¹Nalë nadzë'bë na cashtigu
shtë Dios nanabani.

³²Perë rnia'a lu të, gulë bëagná ldu'u të tiempë nagudëdë. Despuësë bë'në të recibir llni shtë Dios, guc të mënë pacënci lu grë galërzac zi; guc të shmënë më firmë aunquë bë'në të sufrir. ³³Nanú bældá lë'ë të guni'i guidzë mënë guëc të lu ra sa' të. Guzunaldë mënë lë'ë të. Sëbældá de lë'ë të bë'në të sufrir con sa' të. ³⁴Bëga'a ldu'u të ra naguá lachigui'bë nu bëquitë ldu'u të iurë bédchisú mënë lo quë nanapë të purquë rdë'ë të cuendë de quë lu gube'e nanú másru'u cusë mejurë nanadë tsalúdi'i. Shtënë të ra cusë ni. ³⁵Adë cuézëdi'i të tsaldí ldu'u të shti'dzë Dios purquë si talë tsagla'guë tsaldí ldu'u të, gapë të tubi premi ru'bë la'ni guédchiliu naze'dë guédchini. ³⁶Rqui'ni gac të më pacënci parë gunë të cumplir voluntá shtë Dios nu despuësë de ni, gunë të recibir lo quë nabë'në më prometer ca'a të. ³⁷Ra Sagradas Escrituras rni'i:

Du'pë tiempë runë faltë, iurní el quë naze'dë guédchini, segurë guédchíni'.

Adë gac ldé'ëdi'i ldú'i'.

³⁸Perë el quë naguna recibir cumë më justë, guëbánill por fe nanápëll.

Perë si talë guëazë guétëll shneza, adë rquítëdi'i ldua'a con l'é'ëll.

³⁹Perë lë'ë hia'a adë nádí'ia'a ziquë ra narëazë guetë, ra naná condenar, sino rialdí ldu'u hia'a de verdá; zni guédé'na'a segurë salvaciuni parë almë shtë hia'a.

**Zihani mënë gualdí ldu'u
rai' shti'dzë më**

11 Iurë rialdí ldu'u hia'a, iurní nadápa'a segurë de quë

guédé'na'a recibir ra cusë lo quë nadzuléza'a. Rialdí ldu'u hia'a nanú ra cusë nanadë rnádi'ia'a lúhi'. ²Ra shtadë guélú hia'a naguquërdëdë guahietë, bëquebi Dios na rai' mënë za'quë purquë gualdí ldu'u rai' shti'dzë më.

³Rialdí ldu'u hia'a shti'dzë më; por ni rdë'ë hia'a cuendë de quë Dios bëntsa'u lë'ë guédchiliu sulë con di'dzë shtëni'. Ra cusë narná hia'a lúhi' guetsa'uin, lédëdi'i por cusë narná hia'a, sino nadë más por shti'dzë Dios guetsa'u rahin.

⁴Gualdí ldu'u Abel shti'dzë Dios; bé'ni' ofrecer lu Dios tubi ofrendë mejurë quë ofrendë shtë Caín. Bëquebi Dios Abel na më za'quë, por ni Dios bëca'a Abel nu bë'në më recibir ofrendë shtëni'. Aunquë Abel hia gúti', perë todavía ziaagla'guë ruadí'dzi' lu hia'a por medio fe shtëni'.

⁵Enoc gualdí ldu'i shti'dzë Dios; por ni Dios bia'a lë'ë Enoc gube'e; gútidí'i'. Ra mënë adë bédzélëdi'i rall Enoc lu guédchiliu purquë Dios bia'a l'é'i'. Ra Sagradas Escrituras rni'i shcuendë Enoc de quë antsë guziá'ai' gube'e, Dios bëquitë ldú'i' con Enoc. ⁶Sin galrialdí ldu'u, nídi'i mudë guëquitë ldu'u Dios con lë'ë hia'a. Primëre napë quë tsaldí ldu'u nguui shti'dzë Dios parë tsabi'guë nguui lu Dios. Napë quë tsaldí ldu'u hia'a nabani më nu de quë guëne'e më premi ca'a ra narguili lë'ë më.

⁷Noé gualdí ldu'i shti'dzë Dios nu bëzu'bë diágui' shti'dzë Dios purquë más antsë bëtsëbë Dios l'é'i'; guni'i Dios lu Noé lo quë naguër gac, cusë ni tubi adë chu gunádi'i luhin antsë. Noé bëzu'bë diágui' nu bëntsá'uhi'

tubi barcu ru'bë parë gac salvar grë ra shfamíli'. Gualdí ldu'i' shti'dzë më; gúqui' rëspëti parë shti'dzë më. Zni bënë Noé juzguë grë ra mënë shtë guédchiliu nanadë gualdídi' ldu'u shti'dzë më. Mudë ni Dios bënë recibir Noé ziquë nguii justë purquë gualdí ldu'i' shti'dzë më.

⁸Nu Abraham por galrialdí ldu'i, iurë Dios guna'bë lé'i, bëzu'bë diágui'; bërú'ui' parë tsáhi' lugar catë guni'i Dios guëdë'e më ládzi' ziquë herenci. Abraham bërú'ui' ládzi' sin quë adë rdë'ëdi'i' cuendë ca lu tsáhi'. ⁹Abraham gualdí ldu'i; guquërdí ladzë catë bënë Dios prometer, perë Abraham gúqui' ziquë më zitu parë lugar ni. Nabáni' ziquë mënë naná de viajë, lédëdi'i' la'ni hiu'u. Lo mizme bënë Isaac nu Jacob nu zac lë'e rai' bënë rai' recibir mizmë promësë nabëdë'e Dios lu Abraham. ¹⁰Abraham gulézi' stubi ciudá parë guëquërdí, lugar nanapë cimientë naná dchi'chi; ciudá ni Dios bëzá'ahin según guc ldu'u më.

¹¹Nu zac Sara gualdí ldu'i shti'dzë Dios nu bé'ni' recibir pudërë parë gápi' shíni' aunquë náhi' demasiadë më gushë. Gúpi' tubi me'dë purquë gualdí ldu'i' Dios gunë më cumplir lo quë nabë'në më prometer lúhi'.

¹²Zni Abraham hia më gushë sin esperansë gápi' shíni', perë gúqui' shtadë guélú shtë mënë zihani, mënë zihani ziquë mbelëgui'i lu gube'e nu ziquë iu'lli nananú rua' nisëdu'u. Jamás adë chu gúnëdi'i gan guëlabin.

¹³Grë ra mënë ni guti rai' sin quë adë bënëdi'i rai' recibir ra cusë nabë'në Dios prometer, perë gualdí

ldu'u rai' shti'dzë më nu guná rai' lu ra cusë ni delantë. Por fe bënë rai' recibir lo quë nabë'në më prometer nu bëquitë ldu'u rai'. Mudë ni bëquebi rai' de quë na rai' ziquë më zitu parë guédchiliu rë', de quë lidchi rai' cuezë stubi guédchiliu. ¹⁴Pues grë ra naruadi'dzë zni, rquebi rai' de quë todavía quëguili rai' stubi lugar parë guëquërdë rai'. ¹⁵Si talë ra mënë ni nihunë rall llgabë por ladzë catë bëru'u rai', pues niabrí rai' nga'li ¹⁶perë guc shtu'u rai' lugar más mejurë, quiere decir, tubi lugar lu gube'e. Por ni Dios nádi' ziquë nartú lúhi' sino rquitë ldu'u më con lë'e rai' purquë guna'bë rai' lë'e më Dios shtë rai' nu bënë më preparar tubi ciudá catë guëquërdë rai'.

¹⁷Gualdí ldu'u Abraham shti'dzë Dios; por ni iurë Dios bëzú tubi prëbë lúhi', bédchininú Abraham lúniquë shíni' Isaac parë gúni' ofrecer Isaac lu bëcu'guë ziquë tubi ma. Na Abraham dispuestë gúni' ofrecer lúniquë shíni' lu Dios aunquë antsë guni'i Dios lu Abraham tubi promësë; ¹⁸guni'i Dios shcuendë Isaac: "Por shínil gápël cantidá llëbnil". ¹⁹Pues Abraham guc bé'ai' de quë Dios napë pudërë parë guëcua'ñi më ra tëgulë. Zni rac guëní'ia'a cumë figurë de quë Abraham bënë'ni' recibir stubi vultë lë'e shíni' ladi ra tëgulë purquë parë Abraham hia guti shíni'.

²⁰Gualdí ldu'u Isaac shti'dzë Dios; por ni Isaac guná'bëi' lu Dios bendición nanaguër guëdchini parë shíni', Jacob nu Esaú. ²¹Nu zac Jacob gualdí ldu'i shti'dzë Dios;

por ni iurë hia mërë gátì', bé'ni' bendecir cadë shinillágui' naná shini José. Bë'në Jacob adorar lë'ë më mientras rquí'chi' tubi bastunë.

²²Nu José gualdí ldu'i shti'dzë Dios; por ni iurë mërë gátì', guní'i' lu ra më israelitë de quë napë quë guëru'u rai' de ladzë Egipto nu bëdë'ë José ordë lla guëca'chi ra mënë ba'cu shtëhi'.

²³Ra shtadë Moisés gualdí ldu'u rai'; por ni iurë gulë me'dë, adë bëdzëbëdi'i rai' lu rëy lo quë nagunibë'a rëy. Guná rai' lu me'dë, nacha'ngu me'dë. Bëca'chi rai' lë'ë me'dë por tsunë mbehu.

²⁴Gualdí ldu'u Moisés shti'dzë Dios; por ni iurë lë'i' náhi' nguui ru'bë, adë nëdi'i' nacá'ai' lë shtsa'pë rëy shtë Egipto ²⁵sino quë guni'i' ldú'i' sac zíhi' con los de más sáhi' ra mënë israelite. Adë guc shtú'udi'i guëquitë ldu'u Moisés por du'pë tiempë ra cusë mal shtë guédchiliu, cusë nanapë quë tsalú. ²⁶Más bien guni'i' Moisés, mejurë gúni' sufrir por Cristo naná ze'dë despuësë quë niapë Moisés grë ra tesurë shtë Egipto. Zni guc; gunáhi' ra cusë naguër gac ziquë tubi premi naguëdë'ë Dios cá'ai'.

²⁷Por galrialdí ldu'i' Moisés bërú'ui' guë'dchi Egipto; adë bëdzëbëdi'i' llanë shtë rëy; guaglá'gui' firmë igual ziquë el quë narná lu Dios aunquë adë chu rnádi'i' lúhi'. ²⁸Gualdí ldu'u Moisés shti'dzë Dios; por ni bëzu'bë diágui' rëglë shtë Pascu; gunibë'a Moisés de quë guëllë'ë rënë shtë lli'li, nu guëtia'a mënë rënë ni rua' puertë parë iurë tädë ianglë shtë galguti, adë gátidi'i' primërë shini nguui shtë ra më israelitë.

²⁹Por galrialdí ldu'u, ra israelitë gualdí ldu'u rai' shti'dzë Dios; por ni gudëdë rai' Nisëdu'u Llni si fuërë cumë ziquë guiu'u bidchi, perë iurë ra mënë egipcios guc shtu'u tädë rall nisëdu'u, pues bëlda'u nisë rall; guti rall.

³⁰Ra israelitë gualdí ldu'u rai' shti'dzë më; por ni bëdë'ë rai' vultë alreduerë guë'dchi Jericó gadchi dzë nu gulaguë lu' shtë guë'dchi. ³¹Rahab gualdí ldu'i shti'dzë Dios; na Rahab tubi na'a mal, perë adë gútidi'i' juntë con ra nadë bëzu'bë diáguëdi'i' purquë Rahab bé'ni' recibir con bien ra mënë israelitë naguaglda'chi guë'dchi Jericó.

³²¿Pë más guëní'ia'a iurne'? Nídi'i' tiempë parë guadi'dza shcuendë Gedeón, nu Barac, nu Sansón, nu Jefté, nu David, nu Samuel, nu los de más ra nabiadi'dzë shti'dzë Dios guahietë. ³³Por galrialdí ldu'u, bë'në rai' gan lu enemigu shtë rai'; gunibë'a rai' tubi manërë justë; bë'në rai' recibir cusë za'quë nabë'në Dios prometer. Bëta'u rai' rua' león; ³⁴bësëaldë rai' gui'i' dushë; bërú'u rai' lu peligrë niaguini mënë lë'ë rai' con spadë. Ra naná nápëdi'i' fuersë, gupë rai' fuersë ru'bë. Guc rai' mënë fuertë lu guërru, nu bësëllu'në rai' sultadë naná mënë zitu. ³⁵Guzac ra na'a bë'në rall recibir ra tégulë shtë rai' stubi vësë más; guashtë tse'lë rai' ladi ra tégulë.

Sëbëldá mënë guti lu galné; bëqué guia'a rall libertá parë gunë rai' gan tsashtë rai' ladi ra tégulë të guëquërelde rai' stubi vidë mejurë. ³⁶Stubi tantë mënë guzac

zi rai'. Bè'ně mēnē burnē lē'ē rai',
nu bēdē'ē mēnē hiaguē nu bēldi'bi
mēnē lē'ē rai' con cadēnē parē tsa
rai' lachigui'bē. ³⁷Guti rai' lu guē'ē
nu bēriuguē rai' guēruldē rai' con
cierrē; [bētē'dē mēnē prēbē lu rai'
tē gunē rall duldē.] Gudini mēnē
lē'ē rai' con spadē; canzē rai' sin
lidchi rai'; prubi rai'. Ze'dē rai' gutē
rai' gui'di ladi ra ma ziquē gui'di
ladi lli'li u gui'di ladi chivē. Bēzac
zi mēnē lē'ē rai'; nu bē'nē rall
maltratar lē'ē rai'. ³⁸Ra mēnē shtë
guédchiliu adē guná záquēdi'i lu
rai', perē lē'ē rai' lasac rai' más quē
guēdubi guédchiliu. Ra mēnē ni
guquēreldē rai' lachi, nu lu dani;
guquēreldē rai' la'ni cuevē nu la'ni
guēru shtë guédchiliu.

³⁹Grē ra mēnē ni gualdí ldu'u
rai' shti'dzē Dios, nu Dios la'ni
Sagradas Escrituras quēgluá'ai'
na rai' mēnē za'quē, perē sin quē
adē guētē'dēdi'i, adē bē'nēdi'i rall
recibir lo quē nabē'nē mē prometer
⁴⁰purquē Dios napē mē lugar
mejurē parē grē hia'a. Guni'i mē
ra mēnē ni adē gúnēdi'i rall recibir
fin shtë salvaciuni hashtë despuēsē.
Sulamētē con lē'ē hia'a gac rai'
completamente mēnē sin ni tubi
duldē delantē lu Dios.

Jesús na ejemplē parē lē'ē hia'a

12 Por grē ra nagunia'a iurne',
cumē nanū guēdubi ladē
shtëna'a ra nabēlua'a fe shtë rai';
iurne' runē tucarē guēsá'na'a tubi
cu' grētē' ra cusē narunē storbē
con grē duldē naná runē bēshi'di
lē'ē hia'a. Cha guiaglá'ga'a delantē;
gáca'a mē firmē ziquē tubi nardē'ē
fuersē parē gúnēll gan tubi carrērē.

²Cha guia hia'a lu Jesús ziquē
muestrē shtëna'a. De lē'ē mē ze'dē
fe shtë hia'a; na mē el quē narunē
compañi parē tsaldí ldu'u mieti
más. Guc bē'a Jesús despuēsē guti
mē, guēquitē ldu'u mē; por ni guzac
zíhi'; rua'a ldu'u mē dulurē nu shtu
shtë galguti lu cruz. Iurne' cuezē
mē ladē ldi shtë Dios, lugar shtë
hunurē cula'ni mē.

³Gulē bē'nē llgabē iurne' lo quē
naguzac con Jesús; guzac zi mē
demasiadē por ra mēnē mal nabē'nē
cuntrē lē'ē mē. Mizmē manērē adē
guēdzáquēdi'i tē nu adē rdzēbēdi'i
tē mientras rzac zi tē purquē na tē
shmēnē Cristo. ⁴Pues lē'ē tē todavía
adē gudínidi'i mēnē lē'ē tē por runē
tē cuntrē ra duldē. ⁵¿Pē bēa'ldē
ldu'u tē lo quē naquēgni'i Dios lu
tē? purquē ruadi'dzēnú mē lē'ē tē
ziquē shini mē. Naescritē:

Shinia, adē rúnēdi'il desprēci
Shtádēl iurē lē'ē mē cagni'inú
mē lē'ēl.

Adē riádi'i ldú'ul iurē lē'ē mē
runē cashtigu lē'ēl.

⁶Purquē lē'ē Dadē quēgni'inú mē
grē ra shini mē purquē rac
shtu'u mē lē'ē rai'.

Nu quēhunē mē cashtigu grētē'
shini mē narunē mē recibir.

⁷Gulē gac firmē lu cashtigu
narshe'ldē mē guēquēl. Grē cusē
ni tēdē parē bien shtë tē purquē
quēhunē mē tratē lē'ē tē ziquē
shini mē. Grē ra dadē quēhunē
rall corregir shínill. ⁸Perē si talē
Dios adē rúnēdi'i mē corregir lē'ē
tē, nádi'i tē legítimē shini mē, sino
na tē ziquē me'dē lldubi. Es quē
runē mē cashtigu grētē' ra shini mē.
⁹Más de ní, tiempē na hia'a llguē'nē,

ra shtáda'a lu gué'dchiliu rē', bē'nē rall cashtigu lē'ē hia'a nu rdē'na'a rēspēti lu rai'. Por ni más rqui'ni guēdē'ē hia'a sí tē guēnibē'a Dios lē'ē hia'a parē gápa'a vidē sin fin. Na mē Shtáda'a nacabezē gube'e. ¹⁰Ra shtáda'a lu gué'dchiliu rē', por du'pē tiempē bē'nē rall corregir lē'ē hia'a según narni'i ldu'u rai', perē Dios quēhunē mē cashtigu lē'ē hia'a por bien shtēna'a tē gáca'a mēnē za'quē sin ni tubi duldē, igual ziquē na mē; santu náhi'. ¹¹Pues verdá nahin, ni tubi cashtigu adē rsēdchínidi'i lēgrē la'ni ldu'u hia'a mientras quēhunē mē cashtigu lē'ē hia'a; nahin cusē durē, perē fin shtē cashtigu na vidē naná tubldí delantē lu Dios con paz parē grē ra nardē'ē cuendē nu rúnēll recibir cashtigu ni cumē cusē za'quē.

Cashtigu parē el quē narqué guia'a shti'dzē Dios

¹²Por ni gulē guni'inu sa' tē naná ziquē tubi nanápēdi'i fuersē tē adē guēazē guētēdi'i rall lu shnezē Dios. ¹³Gulē quili nezē naná tubldí parē tsanaldē tē nezē ni. Iurní sa'l naná ziquē tubi cujē, adē guērú'udi'ill nezē za'quē sino gáqui' firmē con fe shtēnēll.

¹⁴Gulē guni'i ldu'u tē tsu en paz con grē mēnē. Gulē guanaldē nezē za'quē catē nídi'i maldá. Gulē gac mēnē santu. ¹⁵Gulē gapē mizmə lē'ēl tē adē chu rúnēdi'i faltē ra bendición shtē Dios, nu gulē gapē mizmə lē'ē tē parē adē nádi'i mēnē falsē entrē ra shmēnē Dios. Adē chu gáquēdi'i ziquē gui'lli lda nariaru'bē entrē ra plantē, no sea por tubi de lē'ē tē gac guēllini grē

ra sa' tē con duldē. ¹⁶Gulē gapē mizmə lē'ēl parē ni tubi de lē'ē tē adē guēquērēldēdi'i ziquē mbecu, nu ni tubi de lē'ē tē gunē desprēci ra cusē za'quē shtē Dios; zni bē'nē Esaú; por tubsē cumidē bētuu'll grētē' herenci narunē tucári' ziquē shini naguēlú. ¹⁷Hia nanē tē despuēsē iurē Esaú gac shtu'u gúni' recibir bendición shtē shtádi', pues bēquē guia'a shtádi' lē'i' aunquē nalē guna'bē Esaú nu bí'ni'; hiadē bēdzélēdi'i mudē parē gac cambi lo quē nabē'ni'. Bē'ni' desprēci herenci.

¹⁸Iurē guabi'guē tē lu Dios, adē nádi'in ziquē ra mē israelitē guahietē. Guabi'guē rai' lu dani nazú guēlla'. Guná rai' lu dani catē bēru'u be'lē. Guná rai' nacahi con gue'lē; guná rai' gushēguiu'u con mbē dushē. ¹⁹Bini rai' bē shtē trompetē nu cha' Dios. Ra naná bini ra di'dzē ni, bē'nē rai' ruēguē lu Dios hiadē guēn'i'idi'i bē másru'u. ²⁰Bē'nē rai' zni purquē adē bē'nēdi'i rai' gan niua'a ldu'u rai' lu mandadē naguni'i mē lu rai'. Bē ni guni'i: "El quē nasú guēáhi' lu dani, mēnē u tubi ma, pues napē quē gátí' lu guē'ē". ²¹Nalē nadzē'bē gac dzē ni. Iurē guná Moisés lu ra cusē ni, guni'i': "Nalē rchi'cha nu rdzēba".

²²Zni gac tiempē guahietē, perē lē'ē tē iurnē' guabi'guē tē lu dani verdaderē lē Sión. Guabi'guē tē lu ciudá shtē Dios nanabani; quiere decir, Jerusalén nananú gube'e. Guabi'guē tē lu cantidá mili shtē ra ianglē nabēdēá parē gunē rai' adorar Dios con galērquitē ldu'u. ²³Mizmə lugar ni nanú zihani shini Dios; bēdēá rai'; lē rai' naescritē lu gube'e. Guabi'guē tē lu Dios, lē'ē juēsí nagunē juzguē grē mieti. Guabi'guē tē

lu ra nguui naquërelde gube'e; hia Dios bé'ni' recibir lè'è rai' completamente naza'quë. ²⁴Guabi'guë të lu Jesús, el quë nabësédchini tubi conveñi cubi entrè Dios nu ra mënë. Guabi'guë të lu lugar catè bède'bi rënë narunë lasac conveñi ni; rënë ni runë significar cusë mejurë quë rënë shtë Abel.

²⁵Gulë gapë ciudadë adë guëquë guia'adi'i të di'dzë shtë el quë naruadi'dzë lu të, purquë si talë adë bé'nèdi'i mënë gan guëca'chilú rall lu Dios guahietë, mënë naquë guia'a shti'dzë Dios iurë lé'i' bëtsebèi' lè'è rall, ulla mudë guëca'chilú hia'a lu më si talë guëlua'a tēja'a lu naquëgna'bë lè'è hia'a dizdë gube'e? ²⁶Bë shtë Dios tiempë guahietë bëni'bin lè'è gué'dchiliu, perë iurne' bè'në më prometer con di'dzë rëi: "Stubi vësë más guësèni'bia gué'dchiliu nu también gube'e". ²⁷Iurë guni'i Dios: "Stubi vësë más" rdè'è hia'a cuendë de quë grètè' cusë nabèni'bi Dios, cusë narná hia'a iurne', tsalú rahin; guëdchisú më ra cusë nabèntsa'u më parë guëa'në parë siempër ra cusë nadë rní'bidí'i. ²⁸Por ni cha guëdè'è hia'a graci lu më purquë bèdè'na'a recibir lè'è më ziquë Rëy. Catè rnibè'a më adë gáquëdi'i guèni'bin. Cha guëdè'na'a sirvë lè'è më con rëspëti. Guëdápa'a rëspëti delantë lu më purquë na më Dios shtëna'a. ²⁹Náhi' ziquë be'lè narzunë ldu'u mieti de grë maldá.

Lo quë narunë tucarë gunë shmënë Dios

13 Gulë tsagla'guë gac shtu'u ra sa' të. ²Gulë tsagla'guë gac të më za'quë con ra visitantë nardchini lídchil purquë sin adë guc bé'adi'i mënë, bèldá rall bèdè'è rall pusadë parë ianglë.

³Gulë bësëagná ldu'u të ra nanú prësi cumë ziquë mizmë lé'èl nanul prësi juntë con lè'è rall. Gulë bësëagná ldu'u të ra naná rzac zi purquë todavía quërelde të lu gué'dchiliu; napë të cuerpë débíl.

⁴Gulë bè'në cumplir ra promësë naguní'íl iurë bëtse'al; adë chu guëquénú sáhi' purquë Dios gunë më juzguë grë ra narquénú tse'lè mënë, nu gunë më juzguë grë mënë narunë duldë adulteri.

⁵Adë sébidi'i ldu'u të dumí; gulë bëquitë ldu'u con lo quë nanapë të purquë Dios guni'i: "Jamás adë guësá'nèdia'a lè'è të; siempër guna cumplir shti'dza". ⁶Zni rac guéní'ia'a sin quë adë chu guézá ldu'u:

Lè'è Dadë quëhunë më compa'ni na; adë guëdzébèdia'a lo quë nagunénú mënë na.

⁷Gulë bëagná ldu'u të shti'dzë ra nagunibè'a entrè lè'è të, ra nabiadi'dzë shti'dzë Dios lu të. Gulë guagla'guë manèrë gubani rai'; guc rai' firmë lu shnezë Dios. Gulë bè'në llgabë lla guc fin shtë rai' nu gulë bè'në ziquë bè'në rai'.

⁸Jesucristo na më igual iurne' ziquë guc më antsë nu na më lo mizmë parë siempër; gáquëdi'i më cambi. ⁹Adë rdé'èdi'i të sí parë gua'a mësë falsë lè'è të tèche stubi clasë ldai' por enseñansë nanadë chu riasédi'i; mejurë gac të më firmë lu shnezë Dios por favurë nu bendición naquëhunë më. Adë tsanáldèdi'i të tèche custumbrë narunë tratë pë cusë naza'quë gaul, pues grë ra narianaldë tèche rëglë ni, adë bé'nèdi'i rall gan gac rall mënë za'quë lu Dios.

¹⁰Sacrifici nadápa'a, adë rúnèdi'in tratë gau mieti lu mellë. Ra natsagla'guë gunë rall adorar Dios

según lëy guahietë, nápëdi'i rai' derechë gau rai' sacrifici shtë hia'a. ¹¹Pues ra bëshuzi primërë riutënúhi' rënë shtë ra ma Lugar Santísimo; bën'i' ofrecer rënë ni lu Dios parë guëdchisú më ra duldë, perë cuerpë shtë ra ma bia'a mënë fuërë shtë guë'dchi parë tsequi. ¹²Zni zac Jesucristo guzac zi më fuërë rua' ciudá parë guëzuné më duldë shtë mënë por prupi rënë shtëhi' tē gac rai' santu. ¹³Pues iurne' cha guíá hia'a lu Jesús, guëru'u hia'a religiuni gushë nu sac zi hia'a ziquë bën'në më sufrir. ¹⁴Lu guë'dchiliu rē adë nadápëdi'ia'a lugar segurë parë guëquérëlda'a parë siembrë, sino dzuléza'a nu zudília'a lugar za'quë nanaguër guëdchini despuës. ¹⁵Por ni guëdubi tiempë, cha guëdén'a'a alabar Dios por medio de Dadë Jesucristo. Pues labansë ni na lo quë naguëdén'a'a ofrecer lu më con rua' hia'a. ¹⁶También adë chu guësëá'ldëdi'i ldu'i gunë compa'ni sa'll con lo quë nanápël purquë ra cusë ni na ziquë sacrifici narsëquitë ldu'u Dios.

¹⁷Gulë bëzu'bë diaguë grëtë' shti'dzë ra narnibë'a entrë lë'ë tē. Gulë gapë rëspëti lë'ë rai' purquë lë'ë rai' canihapë rai' almë shtë tē; nané rai' tubi dzë napë quë guëtë'dë rai' cuendë lu Dios. Gulë guni'i ldu'u, gac tē mënë za'quë tē iurë guëtë'dë rai' cuendë lu Dios, gunë rallin con galërquitë ldu'u, lédëdi'i con galërbini ldu'u. Si talë adë gúnëdi'i tē cumplir shti'dzë rai', adë nápëdi'il ni tubi provëchë.

¹⁸Gulë guna'bë lu Dios por lë'ë na'a; pues napë na'a segurë de quë bédë'në na'a dchi'ni según voluntá

shtë Dios. Siembrë galërn'i' ldu'u na'a na parë bien shtë tē. ¹⁹Runa ruëguë lu tē, gulë guna'bë lu Dios de quë nasesë guëne'e më sí, guëabrí guënahia lu tē stubi.

Rialú cartë rë' con tubi saludë

²⁰Dios naná rcue'dchí ldu'u hia'a, el quë nabëcua'ni lë'ë Dadë Jesús ladi ra tégulë, gunë ldai' më guëc tē. Jesucristo na vëquërë ru'bë parë grë ra shmënë Dios. Por rënë më conveni cubi entrë Dios nu ra mënë, napin valurë. Conveni ni nunquë adë tsalúdi'in. ²¹Quëgna'bë na'a lu më, guëne'e më grë cusë za'quë parë gac tē mënë completamente preparadë parë gunë tē cumplir voluntá shtë më, quë lë'ë më guëne'e më mizme fuerse shtë më parë gac tē mënë ziquë rac shtu'u më. Gunë më ra cusë ni por Jesucristo naná runë tucarë grë labansë nu graci shtë mieti parë siembrë. Amén.

²²Bëchi, quëhuna ruëguë lu tē, gac tē më pacënci. Gulë bë'në recibir cunseju nabëquëa'a la'ni cartë rë' purquë adë bëquë'ëdia'a zihani di'dzë lu tē. ²³Rac shtua'a gac bë'a tē lë'ë bécha'a, Timoteo, hia lë'i' nápi' libertá. Si talë guëdchíni' ndë'ë, también na guëdë'pë guená na'a lë'ë tē.

²⁴Gulë bédë'të saludë grëtë' ra narnibë'a entrë lë'ë tē, ra naná cabësë shtë ra grupë. Nu bë'në saludar grë ra narialdí ldu'i shti'dzë Dios de verdá. Pues ra naze'dë ladzë Italia quëgshe'ldë rai' saludë parë lë'ë tē.

²⁵Favurë shtë Dios guëa'nënu lë'ë tē. Amén.